

氏族典第二百八十一卷

汪姓部彙考

鄭樵通志

以名爲氏

古人名

汪氏汪芒氏之裔禮記有汪錡魯人也宋朝爲著姓

廖用賢尙友錄

汪姓

汪平陽商音

汪姓部列傳一

周 汪錡

按禮記檀弓戰于郎公叔禺人遇負杖入保者息曰使之離病也任之雖重也君子不能爲謀也士弗能死也不可我則旣言矣與其鄰重汪錡往皆死焉魯人欲勿殤重汪錡問于仲尼仲尼曰能執干戈以衛社稷雖欲勿殤也不亦可乎注重皆當爲童未冠者之稱姓汪名錡

後漢

汪文和

古今圖書集成
按萬姓統譜文和字國輔建安中以龍驤將軍爲會稽令始遷居于新安子孫遂爲新安望族

宋 汪叔舉

按萬姓統譜叔舉字文遠新安人大明中仕爲軍司馬

唐 汪華

按唐書高祖本紀汪華起新安杜伏威起淮南皆號吳王

汪倫

按李白贈汪倫詩桃花潭水深千尺不及汪倫送我情

注白游涇縣桃花潭村人汪倫常醞美酒以待白

待白

汪萬於

按萬姓統譜萬於字叔振歙人有詩名憲宗時仕爲江陵府法曹叅軍

汪漬

按萬姓統譜漬字清光華之後乾符四年以衙前都虞候分戍三吳嶺累有戰功民賴以安景福二

年授歙州團練使後以拒賊死之世稱爲端公立廟祀焉

汪武

按萬姓統譜武婺源人乾符中爲鎮將屯弦高戰守有功楊行密錄其績以爲節度押衙檢校司空公武以私積市民地置城池戰守數歲遷爲縣因以制置二十餘年民無寇患陶雅爲刺史暴增民賦武不爲屈邑人賴之後爲雅所害賦遂以增邑人至今祀武號汪司空之廟

汪遵

按萬姓統譜遵涇縣人初爲吏事許棠棠應二十三舉遵猶在胥役善爲絕句詩而深晦縝密一旦辭役就貢會棠送客至河澗間遇汪於途訊曰何事至京汪曰就貢棠怒曰小吏無禮後遵成名五年棠始登第遵長城詩云秦築長城比鐵牢藩戎不敢過臨洮雖然萬里連雲際爭及長階三尺高李太尉平泉莊詩云平泉花木好高樹嵩少縱橫滿目前惆悵人間不平事今朝身在海南邊

後梁 汪少微

按十國春秋吳汪少微歙州人也嘗於順義元年撰歙硯銘云松操凝烟楮英鋪雪毫穎如飛人間

四絕

後晉 汪台符

按尚友錄台符徽州人生而靈異逆知吉凶能文章博今古性獨嗜酒徐知誥鎮金陵台符詣陳民問利病知誥甚尊重之宋齊丘疾其高明使親信誘台符飲台符卽知故浮白痛飲臥地因推沉石頭蚶蜆磯下後人每于黃山白嶽見之齊丘聞覓其尸惟衣冠耳

後周 汪煥

按十國春秋南唐汪煥歙州人也開國時第進士初元宗後主皆佞佛而後主尤酷信之莊嚴施捨齋設持誦月無虛日宮中造寺十餘都城建塔創寺幾滿廣出金錢募民爲僧所供養逾萬人悉取于縣官不計耗竭上下狂惑國事日非時有二臣極諫一徙一流最後煥死諫且曰昔梁武佞佛刺血寫佛書捨身爲佛奴屈膝爲僧禮散髮俾僧踐及其終也餓死於臺城今陛下事佛未見刺血踐髮捨身屈膝臣恐他日猶不得爲梁武也後主得諫書云此敢死士也不之罪擢校書郎而言卒不用

宋 汪廷美

按尙友錄廷美婺源人孝友純至義居數十年聚族衆二百口旦暮食必同席有未至者不敢先廷美節嗜欲身衣繒布非祭不肉食親喪盡哀不應賓客遇忌則終日齋肅大中祥符中東封赦減天下賦十之二廷美亦減其佃者租十之二乾興頒遺詔衰經號慕營佛齋者七日嘗以秋冬出糶或勸須春廷美曰貧人覓食甚難仍欲蓄藏待價于爾安乎遠賈有鬻香者去後察其裹得金追而還之里人或竊其鵝問之曰夏至將以祭先廷美曰彼窮乃有孝心助以魚酒又有從質麥種十石者過期給言種敗無所收廷美還其質更遺麥三石以償其費子姪諸孫有過未嘗形諸言但訓以自昔興替之事家人偶有罪過更以爲當坐家長廷美時年六十九或言稱七十宜免罪廷美曰吾已失訓又增年以免罪是誣官也不可會赦遂免郡守欲奏表門閭力辭之

汪文諒

按尙友錄文諒旌德人家饒餘與兄文政俱尙義輕財聚族三百口天禧中旌表其門後以里物獻京師詔賜白金文諒請以賜金易國子監書歸訓子孫從之

汪齊

按萬姓統譜齊旌德人性沉篤好學登慶曆進士歷官祕書郎弋陽令所至有惠愛累遷屯田員外郎將行青苗法齊力言其不便王安石怒之以朝散郎致仕

汪文慶

按恩縣志文慶貝州民王則據州叛明鎬圍之則令民伍伍爲保互相覺察通同者卽斬之文慶自城上繫書射鎬帳約爲內應夜垂紉以引官軍入城者數百人賊覺拒戰官軍不利文慶等復繼而出

汪穀

按萬姓統譜穀字次元婺源人登皇祐五年進士第初授撫州宜黃尉調泰州調太平軍推官俱有異政一旦棄官歸老治田桑保墳墓歲時書問無貴賤必躬治唯謹詞翰可師人皆珍藏之有詩百篇意深語典家居十二年以致仕恩轉通直郎晚而子孫取科第五世榮盛享年八十卒贈少傅子槃有孝行槃子愷仕至左朝請大夫知全州事居官有政聲愷子堯舉右迪功郎鑄錢司催綱官舜

舉修職郎漳州龍泉縣尉

汪汲

按萬姓統譜汲字子遷績溪人年二十登嘉祐進士嘗爲慈谿令以太平州推官鞫贊善大夫陳知規獄方暑繫者百餘多疾病汲解釋浣浴飲食之訊得其情知規復官繫者出爲佛齋以報性潔廉與物無忤而政稱強明卒於元豐中

汪澥

按宋史汪澥傳澥字仲容宣州旌德人熙寧太學成分錄學政登進士第調鼎州司理叅軍知黟縣入爲太學正累遷國子祭酒擢中書舍人爲大司成議學制不合以顯謨閣待制知婺州改潁昌又改陳壽二州徙應天府上章辭行提舉崇福宮卒

汪奕

按萬姓統譜奕字公偉汲子時方復詞賦取士奕年少試太學卽爲第三人與弟襄相繼登第友愛尤篤爲東流令有書生以妄言繫獄憲使欲置之極典奕以爲狂疾奏上果貸死使者以書謝曰微

古今圖書集成
君吾幾陷夫人

汪襄

按萬姓統譜襄字公弼少從兄奕游上庠商河常環號知名見之驚喜與定交仕南陵主簿太守翟汝文引爲兵曹薦其文史足用詞有古風書遣朝士言不喜爲宣城守而喜識汪主簿始襄在太學有詔擇內生爲使臣學教諭以教諸小內侍大司成汪澥以襄名聞時梁師成爲提領方貴寵見襄頗禮憚會襄以內舍三試不中當退舍師成從容言於上有旨特免襄自陳願得退舍不可以襄故亂學校法上使小內侍從襄學者押赴內舍竟不就及登第後師成欲薦爲館職襄自言處學校久方欲試吏州縣不願在冊府師成覺其有嫌遠意寢怒語人曰彼耆儒也詎敢浼之至是秩滿改宣教郎押白金詣金帳用金人權衡虧其半曾怒甚同行皆股栗襄徐辨竟得直嘗作弔陶朱西子賦興寄高遠奕子安世襄子安行皆登第安世天資端厚教後進有法授吉州永豐簿

汪覃

按萬姓統譜覃字天才績溪人少而有奇才應舉八行科東坡見而異之覃後隱不仕號水月居士

東坡贈以詩云季子應嗔不下機棄家來伴碧雲師中秋冷坐非能醉半月長齋未肯辭擲簡搖毫無忤色投名入社有新詩飛騰桂籍他年事莫忘山中採藥時

汪洵侯

按萬姓統譜洵侯字信仲婺源人熙寧末入太學不第於是歸隱子幡然字聖任彬州推官孫庭祐字子卿受業于朱晦菴先生諸從子浩然卓然皆以學行貢于鄉

汪輔之

按萬姓統譜輔之字正夫宋神宗朝爲北京運判時文彥博以侍中判署北京輔之密劾其不治事上批曰輔之小臣敢爾無禮

汪舜舉

按萬姓統譜舜舉字伯俞祁門人登紹聖進士第仕至信州通判時清溪洞方臘反蹂躪十二州至信州舜舉伏兵柳家都大破之追至衢州寇平授朝請大夫直祕閣賜銀五百兩絹五百疋以旌其功乃築示嘉後樂二亭與信人同樂內相汪藻爲記尋除江東提刑卒贈大中大夫

汪洙

按尚友錄洙字德溫鄞人九歲善賦詩時牧鵝疊宮見殿宇傾圯洙心竊嘆之題其壁曰顏回夜夜觀星象夫子朝朝雨打頭萬代公卿從此出何人肯把俸錢修上官奇而召見時衣襦褐問曰神童衫子何短耶洙輒對曰神童衫子短袖大惹春風未去朝天子先來謁相公世以其詩詮補其集用訓蒙學爲汪神童詩登元符三年李釜榜進士任明州教授著春秋訓詁召陞宮教拜太宗正卿至觀文殿大學士提舉台州崇道觀築室西山月集諸儒講學以教授族閭之子弟鄉稱崇儒館卒諡文莊平生稟性仁厚忠孝著聞子思溫觀文殿大學士孫大猷敷文殿大學士

汪若楫

按尚友錄若楫字作舟休寧人崇寧間爲紫陽書院山長歷官宣城尹精研理學尤工于詩所著有秀山集十卷

汪希旦

按萬姓統譜希旦字周佐歙人大觀三年登第歷官知泗州時劇賊宋江橫行及濠濠泗密邇希旦

嚴爲守備賊不敢犯上嘉之轉朝奉郎直祕閣會旱蝗開廩賑給蝗不入境麥生兩穗歷知袁江舒三州請祠以朝請大夫致仕

汪叔詹

按萬姓統譜叔詹字至道歙縣人少敏于文累官太常博士尋知鄂州轉河南憲使有惠愛後領湖廣江西等路財賦

汪思溫

按友錄遺思溫鄞縣人政和初進士累官至太府少卿鄉之士族有喪不能舉孤女不能嫁者思溫割田給助爲鄉里倡

汪藻

按宋史汪藻傳藻字彥章饒州德興人幼穎異入太學中進士第調婺州觀察推官改宣州教授稍遷江西提舉學事司幹當公事徽宗親製君臣慶會閣詩羣臣皆賡進惟藻和篇衆莫能及時胡仲亦以文名人爲之語曰江左二寶胡仲汪藻尋除九域圖志所編修官再遷著作佐郎時王黼與藻

同舍素不咸出通判宣州提點江州太平觀投閒凡八年終黼之世不得用欽宗卽位召爲屯田員外郎再遷太常少卿起居舍人高宗踐祚召試中書舍人藻多論奏宰相黃潛善惡之遂假他事免爲集英殿修撰提舉太平觀明年復召爲中書舍人擢給事中遷兵部侍郎拜翰林學士紹興二年除龍圖閣直學士知湖州又知撫州御史張致遠論之予祠陞顯謨閣學士知徽州逾年徙宣州言者論其嘗爲蔡京王黼之客奪職居永州二十四年卒秦檜死復職官二子藻通顯三十年無屋廬以居博極羣書老不釋卷尤喜讀春秋左氏傳及西漢書工儷語多著述所爲制詞人多傳誦子六人恬恪憺惓懷惓

汪伯彥

按宋史汪伯彥傳伯彥字廷俊徽之祁門人登進士第積官虞部郎官靖康改元召見獻河北邊防十策直龍圖閣知相州金人陷真定詔徙真定帥司干相俾伯彥領之康王奉蠟書開大元帥府以伯彥爲副將北兵薄京城城破金人逼二帝北行張邦昌僭立王聞之涕泣明年王承制除伯彥顯謨閣待制升元帥進直學士高宗卽位擢知樞密院事未幾拜右僕射伯彥在相位崇權自恣不能

有所經畫御史諫官下至韋布內侍皆劾奏之罷爲觀文殿大學士知洪州改提舉崇福宮尋落職紹興初復職知池州江東安撫大使言者弗置乃詔以舊職奉祠尋知廣州四年舍人王居正論伯彥不已復褫前職九年知宣州過闕拜檢校少傅保信軍節度使十年請祠從之明年卒諡忠定初伯彥旣去相州金人執其子軍器監丞似使割地以至相州守臣趙不試固守不下遂拘而北久之乃還或云似之得歸伯彥實使人贖之似後更名召嗣

汪若海

按宋史汪若海傳若海字東叟歙人未弱冠游京師入太學靖康元年金人侵擾朝廷下詔求知兵者若海應詔未三刻而文成擢高等二帝北行袖書抗粘罕請存趙氏縋而出謁康王於濟州謂神器久虛異姓僭竊宜早卽位以圖中興補修職郎充帳前差使高宗旣卽位推恩改承奉郎遷江南經制使轉承事郎監登聞檢院五府交辟改屬右府論軍食迭執政通判沅州以讒奪籍謫英州時節制江夏軍馬李允文擁衆十萬跋扈不用朝命若海往諭允文大感悟卽舉軍東下復招其徒張用曹成李宏馬友同歸朝廷湖湘遂安尋復承務郎監潭州南嶽廟通判辰州紹興九年復三京祇

古今圖書集成
謁陵寢事還以前功四遷至承議郎通判順昌府辟淮北宣撫司主管機宜文字拓臯之役復以勞
兩轉至朝散郎通判洪州丁內艱服除添差通判信州秩滿遷湖北帥司叅議知道州授直祕閣知
江州丁父憂死

汪沆

按萬姓統譜沆字濟遠靖康間金人犯闕結盟去沆時爲太學生逆知必渝盟叩閣上書極論求才
練兵爲守禦備不報明年金人再至沆以書抵粘罕陳大義及用兵利害遂東歸遇李綱又投書有
言不足慮實深可慮者四綱遽之竟以國恥未雪憤惋而卒

汪杞

按萬姓統譜杞字南美婺源人祖漸號耕巖翁游辟雍官至奉議郎父路登紹聖丁丑進士第終信
州貴溪知縣杞繼登建炎二年第知英德曲江兩郡仕至朝散大夫知韶州府所在有政績弟利往
登建炎二年進士第子邦直當受遺澤乃隱遁自逸卒贈宣教郎孫應時從孫文

汪介然

按萬姓統譜介然字彥準婺源人少領鄉薦入太學不第後從岳飛及韓清軍以戰功補進義校尉嘗使金洪皓附以蠟丸書介然剖股納之還奏於朝及和議成皓得歸謂子孫曰微夫人之力不及此累官觀察使主管台州崇道觀致仕卒

汪漢

按萬姓統譜漢字瀚美歙縣人重然諾尚氣義鄉人以是非來取直者徐以利害開諭莫不感服紹興中張琪寇邑中逃匿殆盡乃攜家衆走西坑山側一日賊至漢奮前與語爲善事因推隨身貲以與之賊戒其徒曰好善人勿得殺紹興乙卯以國母壽恩授右迪功郎時年八十七

汪臯會

按萬姓統譜臯會字元贊黟人登紹興二年進士第授嚴州壽昌簿調建昌軍學宮舊火于兵至是始創臯會留意教養改秩宰潭州醴陵邑自寇旱後氓逃土荒公延頽弊臯會撤而新之遂以奉議郎致仕居里閭益以書自娛著文數十卷學者稱醴陵先生

汪勃

按黟縣志勃字彥及紹興二年登第調嚴州建德主簿紹興十三年除太常簿入臺爲檢法歷三院御史右諫議大夫遷御史中丞十七年除簽書樞密院與秦檜不合數上章求出以端明殿學士再領外祠凡六年復起知湖州爲政安靜不尙鞭扑比退居專以教訓子孫爲務子作礪爲太常簿孫義榮義端同登第後復龍圖閣學士卒

汪杲

按萬姓統譜杲紹興間知新淦縣學校一新文教振舉新淦之士盛於他邑者杲之力也

汪愷

按萬姓統譜愷紹興五年詔復十科取士葉夢得薦愷及徐度汪藻薦徐度王棠中興後以十科薦用自此始

汪應辰

按宋史汪應辰傳應辰字聖錫信州玉山人紹興五年進士第一人授鎮東軍簽判趙鼎爲帥幕府事悉諮焉歲小旱命應辰禱雨名山卽應越人語之曰此相公雨鼎曰不然乃狀元雨也召爲祕書